

崇百藥齋三集

崇百藥齋三集第五

陽湖陸繼輅補孫

玳梁乙集

戊子

春陰

春陰人病太無聊殘雪閒庭半未消只有素娥真耐冷
瑤樓正月換單綃

新年禮數許全刪贏得蕭齋日日閒稍恨題詩無寄處
草堂也自掩重關

初春情緒似殘冬月色燈光隔十重急啓小窗看夕照
水雲剛上最高峰

年年秋病最纏綿春病心情更可憐已是濃雲推不去

小窗又放藥爐烟

蕭蕭雨打上元燈
徑竹檐花總可憎
欲報長娥知病緒
幾時步障撒青綾

洞仙歌

雪珠

積陰久病祔花情
雲想都付忽忽剡溪槳
訝楊花太早荷露誰穿
忽聽得一片小庭簌響
銀河冰未泮
碾作鮫珠不是眞圓
最搖蕩何許倚闌干
遮莫葉寒也難說
置身蕭爽試回數
東風幾時來但記得元宵
不會同賞

江城子

吳大令移居蕭家橋徒步可過嘉而有作

兼旬孤負踏春陽
是衣香是花香
才見江隄幾樹柳

絲黃君正移家儂病起攜手處午陰長 小橋殘碣
記蕭梁有蕭郎有蕭娘中隔一株紅杏似新妝賺得
鳳車飛不住剛繞髻又窺牆

異之寒燈課讀圖

釋家三光日月燈其功乃可參升恒因之志士奮然起
力挽流光去如駛管生與我同孤貧爲述往事聲先吞
三世子子餘三人母侍大母撫慰孫拂拭一几無纖塵
書冊刀尺縱橫陳朔風穿窗雪打門孤燈焰小時欲昏
全家圍坐寒光分初箴不輟身先勤或至屋角明朝暎
君姑漸迫摧頽景病榻傳經間悽哽此時晝短夜差長
侍疾餘閒惜俄頃君今文行出儕輩想見重幃心力瘁

傷心猶是舊燈檠
焚膏中有孤兒淚
吁嗟燈滅可復明
兩度風木悲難勝
歸院金蓮修史燭
不及孤墳飛流螢
我亦煢煢節母子
往事明明來眼底
乞取餘輝亦徒爾
泣告先靈兒老矣

賦蜀鏡爲宋博士同年

迎仙宮中十日飲
降旂早豎愁眉錦
可憐入草一行人
血染秦川吁太甚
繪山隨風飄作烟
金牀高坐卅五年
銅牌妖讖未足悔
太子鐘隕甯非天
此鏡依然圓不缺
猶是青城山上月
星冠霞帔望全空
鏡面如銀背如漆
短短韶華委逝波
同光一鏡又空磨
樽前試唱甘州曲
自古歡筵別淚多

再賦蜀鏡

并序

宋博士拓鏡銘見寄乃卽當眉對臉云云後主以賜王承休妻嚴氏者也前蜀之亡論史者多歸咎秦州之幸余以爲不然兩川天府勲儼誠驚材縱不能戰豈遂不能固守稍與相持崇韜不誅亦犇國卹去矣厥後王全斌入劍門孟氏養士四十年亦曾無東向發一箭者豈非天哉復成一詩質之博士

秦州十月貪狼風君王吹墮天啓宮岌韜才豈鍾鄧比得國復與摧枯同宗勲不遁弼不反牽羊但乞須臾緩彼軍豈特招討亡新磨鏡亦旋無光世修降表才偏捷此際嘉王淚猶濕三趙村南月一輪照見冤魂鏡中泣

故物摩挲未化烟綺窗人影望如仙與朝亦有千秋鑑
周后啼粧更可憐

三賦蜀鏡

并序

余賦蜀鏡以王衍之亡由于天命之不祐觀者或非之
復成一章以盡前篇之意

七出淩花萬行淚開奩髮髻香雲膩可憐十國最先亡
興主安知乾德字當壁何須怨兩宮有人更擅數錢工

謂唐

劉后不聞撻婦揮冤刃

劉威碩以撻妻棄市蜀中故終事也較嚴氏之通抑又甚矣終

古降王泣弛弓

謂孟昶

君不見瞿塘一戰荆南走何至難

爲鍵戶守七里亭前回鶻裘三辰誓約還成負探策先
徵八日鐘金牀兔死玉輪空誰言一鑄雙鏡毀盡先

朝奪命龍

附和作

管同

黃門有妾世所歎五通氣毬鸚鵡禪蜀王自古多情
甚可惜春歸成杜鵑一朵菱花承湛露武擔石鏡相
隨去寫翠傳紅漫作銘此中天子真無數牆東寶此
如軒銅雲間摘辭艷且工綠窗開奩訝明絕盪磨曾
受貪狼風君不見潤臉呈花姿替月一例吳家閉鸞
髮成虧人物總難論破鏡翻全碑半碣王承休本宦者故起用陳坡戲語世所傳興福寺半截碑唐宦者吳文墓碣也其妻似從一而終者碑美之云潤臉呈花圓姿替月其可笑如此

鄧廷楨

迎仙殿裏鳴虬箭明星曉鏡勻妝面盤龍別照一枝
花比似青城山月艷爲憶秦州出閬中雲旗畫捲貪
狼風遙望錦官歸不得春魂又泣杜鵑紅後官剩有
蘼蕪妾七尺菱花閉香篋舞罷孤鸞一死輕甘心去
化青陵蝶莫道興亡劇可悲千秋流落有誰知卽今
一片牆東影曾與張郎照畫睂王葑亭通政有蜀官
妝鏡歌爲張瘦銅舍
人作其詞云連環寓意背銘工承恩當日來天
雄蓋卽此鏡則于庭所藏當是舍人故物耳

賦南唐宮鏡并序

余藏一漆背鏡銘云臨池月上靚貌嬌來不知何代物
也強屬之南唐以妃宋博士蜀鏡並爲一詩俟好事者
和焉

吳王一目重瞳子金陵三見陽烏_日迫謂三王皆以日旁字命名果然

一事擬重華中宮容德皇英似自賦哀蟬絕代工燒槽

弦斷月輪空香階剗屐民間語情事何因到九重無限

江山悲遠眺此時此鏡猶雙照天上應停烏鵲橋後主生年

皆七月七日魂歸好傍黃陵廟滿目興亡鏡影秋南唐西蜀

最風流傷心他日燕山曲又聽羈人訴別愁

後春陰詩

冷暖商量待脫縣病餘情緒薄陰天一春小飲纔三度

長日相思抵十年似爲飛花圍步障怕教明月送秋千

閒中眠起都無定忽訝凭闌在曉前

難藏幽怨是看彎一任銀花閉玉顏薄霧誰知中有月

南風何意欲沈山綠陰芳草都催暝挑綫然脂那破閒

爲惜新鶯好毛羽別裁寸楮疏繡蠻繡蠻鳥色宋儒誤注鳥聲

半似冰寒半麝溫未分明處最消魂慊慊午睡雲鬟重

淺淺晨妝玉鏡昏除是調弦堪對語本來破粉易成痕

端憂彫盡生花管那得劉郎與細論海樹詩畫雨畫晴都不似最難著筆

是春陰

纔見朝暉上鰭牆片雲過處又昏黃閒閒研匣書殘墨

攥捲簾波放篆香花葉寄將前夜夢柳絲改盡去年狂

如何一賦湔裙雨前賦春陰乃記初春情事引得春愁爾許長

附和作

管繩萊

柳絲飄後又桐絲似夢如愁二月天錯落星辰非昨

夜分飛勞燕各經年空將酒琰酬初七欲祝花鈴護
大千怪道蒼苔侵履跡一春長倚玉欄前
曲景橋南路幾彎相思不見損朱顏乍教隱見窺纖
月難把歡啼畫遠山芳草有情同黯淡落花無語自
蕭閒曉來聽取流鶯轉裁作新詩字字蠻

卸衣嫌冷著衣溫斷盡春魂斷別魂桃葉渡江商去
住繡衾壓夢失朝昏儘客明鏡偷看語莫遣香泥汗
襪痕梅子青圓海棠瘦流光霑濕不堪論

離懷渺渺限紅牆粉漬盈盈染褪黃惆悵花枝常帶
淚網繡簾幙似聞香湔裙挑菜都違約浪蝶遊蜂也
戒狂誰識班騅門外路東風吹恨極天長

聰應

春情誰與致纏綿耐盡輕陰夢雨天
病起看花常薄暮愁中度日似經年
清輝屈指過三五濁酒何心擲十千
一步閒庭芳草地更無人影到闌前

賸有空明水一彎衰桃顧影惜朱顏
本來寶髻團香霧長見修眉蹙遠山
殘照偶從雅背現孤吟除伴鳥聲閒
自驚帶緩知腰瘦反向人呼作小蠻

朝來擁被戀餘溫欲斷迴腸先斷魂
沈睡乍醒還似夢峭寒晏起易成昏
儘容簾底留香篆嬾向臺邊拭鏡痕
花事闌珊人別久重重幽恨那堪論

數株垂柳拂落牆半欲飄絲半嫩黃
飛燕依然尋舊

壘游蜂何處曾殘香經旬屢改登山約一病全除倚
酒狂硯匣不開鑪炭冷知他閒晝爲誰長

自題春陰詩後次叔安韻

金猊烟重鏡光沈耐得春歸是積陰此日逢君宜戴笠
中宵聽雨定孤衾調琴總覺么弦緩欹枕方知晝閣深
只我自驚花骨豔怕教鸚鵡學新吟

龍眠山水漲春波風急天低奈別何情到不勝思入道
詩無確詰易傳訛桃花過眼成陰早湘竹全身漬淚多
偏是江村新豆熟樽前仿髯見修蛾

有悼

獸客殘春愴舊游蓮池相見正清秋此時攬鏡猶濃髻

多負裁牋許狀頭弱腕自留千世蹟顰眉端合一生愁
如何病榻都無分海燕驚飛出畫樓

埵鶴棲鸞事有無雲英一傳竟全誣手揮故相局禪闢
心許狂奴慟酒壚粉本尙餘仙蝶在瑤田從此國香蕪
何人酬得憐才淚慙愧江東孫伯符

送錢公子

符祥

攜高夫人省親豫章用春陰詩韻

人尙披裘柳脫絛江城春盡

君以立夏前一日抵皖

峭涼天客中

良晤貪微雨眼底清才此少年招手濃雲眞尺五驚心
征路慣三千遙知薄宦愁眉展

會君官峽江丞貧甚

玉樹瑤環慰

膝前

江亭風景似雲灣暫借離觴照玉顏入檻波光中婦鏡

當窗睂黛小姑山刀鑲別緒三年久閨閣游蹤一月閒

試仿代吟銀燭例竟揮纖管頌平蠻

君方擬作回疆凱哥

十年猶戀嫁衣溫壻自歡顏婦斷魂草草啼妝籠曉霧

朝朝晏起易黃昏卷中南浦新詩句

里中親故送行詩成帙

袖上

西洲舊淚痕羯末封胡零落盡外家往事與誰論

息陰

齊名

庭院舊落牆記得辭家木葉黃

余別里門在乙卯十月

老我寒氈辜相宅有人畫省尚含香

謂閭岑郎中

隨身無復

中郎籍坦腹猶傳逸少狂女慧男蚩增悵惘臨岐何止

別愁長

附錄次韻之作

高蘭晚靑

細草平蕪綠渺緜長江新漲欲浮天人間春好惟今

夕客裏詩來憶去年數到番風剛廿四怕聞征路說
三千烟波卽此成偕隱家具無多盡眼前

片雲不掩月痕彎纔見遙天放霽顏差喜遠行攜骨
肉願流歸夢到家山雨絲應共三春盡花事何曾一
日閒那得鄉音頻入耳生憎檣燕語聲蠻

薰籠猶自戀餘溫回首深閨欲斷魂話到離愁言轉
少流多清淚眼常昏便浮大白渾難遣倘覓殘紅尙
有痕試問玉壺能買否千金一刻共誰論

漠漠濃雲接荔牆江亭斜照近昏黃也知人影新來
瘦自惜羅衣舊染香對此已擗終日睡倩誰頻戒少
年狂遙憐阿母無聊坐憶女情隨夏景長

謝張五

若恒

餉宜興茶壺

鄉物煩君手自持蜀山剛過焙茶時十年夢繞東西沱
一座分斟深淺卮響竹噴壺消暑具疎簾清簟故園思
買田共有平生約愁讀坡翁試院詩

答孝逸次來韻

饑來驅汝作粗官僻地還如鄉塾看殘客漫勞乘興訪
貲郎敢說宦情闌閒鷗有性馴非易芳草銷香事更難
苦憶宣南坊畔住君留夜飲我朝餐

入夏半月久雨峭寒再次叔安韻

濛濛庭院鳥聲沈不共春歸是綠陰塵篋久忘前棄扇
燭房催展合歡衾舉來香草詩懷綺坐近羅襦酒味深

可許明朝同早退濃烟破處一蟬吟

方塘半畝足烟波棖觸鄉心奈遠何逆水一帆仍易別

謂錢逢庚雨度又成訛月中搗藥仙娥病天上投壺玉

女多

連夕見電光

差喜田家唱隨好眼看新麥有飛蛾

放晴三次叔安韻

飛光亦自感升沈破曉全開一徑陰玉版商量消夏課

鈿牀重疊辟寒衾退縣愈覺腰圍小漾綺遙憐樹色深

準擬今宵邀對月可容移坐聽微吟

親手烏絲界衍波燕臺詩意定如何孤花隱草誰曾見

逐鳥還巢恐易訛夏雨翻愁甘澤少楚天從古怨思多

小園纔許經行遍笑比身輕出覩蛾

叔安見要不作七言律詩三日而僕先背約四疊

前韻告之因請弛禁

無復纖毫比綠沈漫勞黃絹記碑陰偶裁短詠供書蓬
易得成篇便擁衾老杜我猶嫌瘦硬太元人已薄艱深
何如呼取閒鶯燕來聽先生倚檻吟

一尺軍持千頃波廣長其奈鈍根何瑤樓素月明明在
錦瑟華年字字訛箋注紛挐經學誤畫圖省識美人多
粗才任詡如椽筆不值張郎寫翠蛾

附詩

陳方瀾

碧城芳訊怨浮沈望裏瑤華隔夕陰誰見抽刀能斷
水本來織錦合裁衾游蹤似夢頻頻換愁緒如雲旋

旋深手展瑤箋三百幅粉奩脂盞又重吟
日影微矍照簾波可無佳句擬陰何鴛鴦繡易翻新
樣蝌蚪書難訂舊訛早讀方言吳語慣從嗤今樂鄭
聲多試看七寶江郎管會引仙人五色蛾

復雨五疊前韻

開簾失訝遠山沈迎得朝陽又夕陰儘耐薄寒憐畫檻
抵催殘醉惱香衾扇紈灑墨分肥瘦弓屐沾泥驗淺深
依舊筍輿留不住悔將絮語換清吟

一盼分明剪月波河源隔座奈伊何裁箋漬淚痕猶濕
中酒懷人事半訛道是洗車秋太早爲誰飄瓦夜偏多
此時愁殺單棲蜨那及尊前赴燭蛾

仙源

道是仙源定耐尋垂簾未覺畫堂深
纖羅何計能藏豔一帶由來不結心
湘竹千條紅雨重博山雙縷紫霞沈
冰弦私語聽來慣乍遣東陽悔苦吟

觸事有感簡伯厚叔安

霜華吹空玉輪滑陽鳥啞啞倏排闥
西池桃實今幾回太華嵯峨見華髮
瑤林瓊樹輝青春金旋石轉碾作塵
蒼浪主人自不惜那有凡淚澆仙根
一鏡團團蟾魄小餘光不照傾城老
可憐歡向掌中銷猶勝飛蛾抱香槁
齊紈八箠秋聲警燒燭塗妝還對影
欹鸞壓鳳怨東風未遣嘵嘵喚教醒

花月小遊仙

素娥手疏奏明光生縛妖魅獻紫皇
四萬八千修月戶論功齊換白霓裳

花王奉敕踐蘭唐蕙翦桃弧集衆芳
預請瑤池行大饗蜂輪厓蜜蜨輪香

雞犬何曾拔宅昇司香餘慶錄雲仍
桂華畢竟還丹在種到瑤天第七層

句漏丹砂幾許存笑他乞令太紛紛
都教管領霜風去五萬秋花正夕曛

待來不來曲

閒庭佇月停素琴待君不來月已沈
君來卽是天上月

秋水開奩訝明絕只恐鏡前豔質銷博山分暖團香雪
烟鬟半軀春衫短昨夜一尊歸思緩定知無意踏金蓮
直遣相思試銀管蝶蛹珍重守秦宮未解懷中勝眼中
但教明日珠簾下驗取羅巾玉筍紅

東飛伯勞曲

東飛伯勞西飛燕鬱儀結璘不相見當時密誓指秋河
那信人間有冰霰恩怨紛紛雜瞋喜蘭蠹偏能抱香死
蟬魚壽命復幾何三食神仙豈堪俟鬢絲易編機絲緇
羨君望君君不知若使相逢通一笑赤燁元冥俱愆期
齊紈燕玉芳心警一栢且駐須臾景大椿閱世爾許長
宿鳳棲雅誰記省

浣溪紗

隔院薔薇送折枝薄寒天氣亂頭時
醉來情緒耐尋思
夜雨頻教侵繡被曉風只解縐羅衣
妝成長自下樓遲

詠壽字香合和叔安

小夢游仙夜清齋繡佛晨重簾深不捲
中有染香人錦幄垂垂臥辟邪
曉風吹斷博山霞別鑪玉飭團欒字
放出金枝頃刻花西池霜冷斜痕皺
那及寶王無量壽百轉千回續命絲
爲誰繫住蓮華漏歲歲樽前樂未央
年年鏡裏減容光直教銷盡星星火
纔識相思寸寸腸剪取盤螭六曲屏
連環私印語丁寧願將枕畔長生誓訴

與天邊南極星

詠芙蓉汗衫和叔安

樓外深深簾不捲樓頭那放湘波展削月籠烟一尺腰
鸞絲雙扣流蘇短百轉千回結細絲此時真許看西施
守宮點臂紅猶漬么鳳銜花騎不飛春風送盡閒桃李
橫塘隱隱輕雷起剩有秋江自浣紗鏡中人影羞粧綺
冰肌漫說清無汗合歡怕見團團扇良會偏同霧縠疎
當風不共雲鬟亂簫局新停百和薰休教搗麝便成塵
瑤池舊侶勞相待還我平生蓮葉巾

繭虎和彭城君

山君心性太纏綿攬鏡能增鬢影妍縛急儘教牽一髮

臥來可尙記三眠幾人曾試援枹手笑我猶資寫韻錢
何日種桑連十畝互斟蒲酒祝長年

東伯厚

鍵戶又聽三日雨下簾如隔一山雲閒中惘惘誰能會
局外詹詹我欲云打鴨驚鴛空咄咄乞漿得酒正紛紛
知君夜夢迎恩閣

里中觀競渡處

翠羽金支耀夕曛

角黍

全身著綠蓑緘愁寄汨羅休疑洛川上微步見凌波

蒲劍

削蒲製爲劍劍弱不堪擊君試持作鞭何如棒五色

唐秀才

客

漏湖漁隱圖

瀟湖烟景最宜秋客裡披圖愴釣游多謝荆南山一角

年年天際望歸舟

先人墨妙軼香光

先君書出入平原華亭間流傳甚少聞君家藏有數幀

深感妙

籠尺幅藏今日天涯同話舊居然一度抵還鄉

語蚊

誰與么麼借羽翰破人清夢妒加浪揀教一飽飛焉往
若解三緘跡更難雒水傍徬徨曉腕謝孃辛苦撲輕紈
紗厨竹簾成吾嬾留汝聊同警枕看

爲張太和

文鳳

題畫

知是天台是武陵重來門徑總無憑仙雲只似琉璃薄
隔住人天界一層

煙雨冥濛正釀春
溪萍隄草一番新
未知畫舫游何處
隱隱風帆不見人

黔山岑律接滇山
千疊晴雲擁翠鬟
料得山深雲盡處
猿吟鶴唳望君還

修竹吾廬別十年
客中相見畫中憐
秋潭不肯出山去
長照湘妃髻影妍

虞山楓葉最知名
讀畫無端別恨生
何日吳江浮短櫂
夕陽紅處酒旗橫

僧歸蕭寺鶴歸巢
一望雲天正沈寥
獨有孤山林處士
扶筇行過段家橋

答桂五博士

紹萬

次來韻

浮生有聚能無散深淺相思我自知
一度河梁成舊雨
全收江草入新詩
昏猶掃葉呼燈早
迨便更衣見客遲
近狀只斯君可慰
縱譚或在聽秋時

臺城路

蛛絲

春蠶剛逐仙蛾化無端又抽愁縷低趁簾紋斜牽柳
綫都是箇儂情緒辛勤機杼問網得殘花可留春住
一角斜陽怪伊偏在斷腸處
年時曲闌共倚有鬢
雲低亞粘上輕絮芳砌苔深閒窗病迨訝許荒涼庭
宇拚教延佇便數徧冰絲罨將飛雨誰似天孫耐年
年別苦

附和作

鄧廷楨

詞三集卷三
三
鍼樓未乞天孫巧柔絲早盤千縷門月將圓飾風欲
破曾是舊纏縣處依稀網戶問底事勾留恁般傾吐
弄影墻東珠塵的皦綴清露誰家吹臺舞榭寂寥
金粉地牽惹愁緒遠借果恩斜連絡索滿眼淒涼今
古蜂縈蝶誤更相對青蟲綠陰鄰樹待喚花奴帚義
親付與

哭程上舍

德賚

漢湖幾度愴離羣帆影蒼茫竚夕曛豈爲學成慳汝壽
更誰年少定吾文斷斷護法揮神杵草草歸喪托練裙
君客死吾州婦及子殤料得祝予千點淚北江秋漲欲
一妾守志護柩歸婺源

連雲

謂君師哭
君仲倫

對月

樓高院小月來遲對月常於臥起時屈指西風又愁絕
此情惟有玉繩知

臺城路

憶蟬

一春花事都成恨忽忽看伊飛去薜荔牆低蘼蕪路
遠去也何曾回顧風淒月苦正多病房櫳驚秋情緒
似此天涯經年眞在夢中住偏是花房無恙記頻
窺傳粉親繫金縷試更憑闌分明聽得扇底喁喁私
語鶯招燕妬怕蛛網牽絲棲香還誤若待歸來趁仙
裙未故

長亭怨慢

借張魯岡大令置酒江亭餞于
庭北上于庭有詞繼聲爲別

剛贏得離懷同訴又聽尊前鈿箏移柱細數春游落花清淚總如雨閱人多矣瞋不到長亭樹樹若不關情爭慣把征帆留住君去問銅弦激楚可稱翠帷私語哥裙舞扇知多少少年題句千萬記尺五城南休重踏探春前路怕忍俊周郎偏值新聲微誤

附元作

宋翔鳳

已贏得清愁空訴倒了金尊更停弦柱細數重逢幾番斜日幾番雨眼中人遠波萬疊雲千樹小立試恩恩被一岸疏楊留住臨去憶前塵似夢不獨青山無語孤懷縱在祔各積斷篇零句爲後夜定迴相思肯自說歸期頻誤怕過盡江風難記年年江路

賦新月和伯厚

珍重清光點素秋天涯隨處餉離愁爲誰耐盡連宵雨
住我曾無近水樓鏡裡雙睂猶待畫樽前半臂已全收
輸君涼夜吟懷好手疊簾波付玉鉤

附元作

楊大壩

前度清光似此不蛾睂生小易驚秋行人繫纜應回
睇旅館呼燈忽舉頭圓夜可能明鏡檻落時猶記傍
簾鈎醉來試唱迴風曲莫放金波匝地流

作書寄舍姪客至未竟所言漫題一絕句

留太無聊去亦慵人疑心性底從容吳儂生小江船住
只解閒眠待轉風

題憶山堂詩

朋舊編詩次第成如君何必以詩名略留情緒傳千古
已恐亭林畏後生

題香蘇山館詩

江右三家出最遲秋鐙棖觸對牀時才人老去能莊語
忽憶一篇集外詩

送韓三舍人

致旋里

二十七年同榜客見面茫然不相識君訝沈郎腰轉瘦
我驚潘令頭先白人生上壽纔百年去日如何不可惜
漫將陸海匹韓潮福慧分涂各自豪怪君不肯長安住
鳳池一擲比鴻毛仲華持節江鄉好晝錦歸來人未老

嶠筠中丞
故壽州人

若論富貴兼文章玉臺猶恨修文早

謂直卿
侍郎

我生夙負傷離債臨歧慣漬征塵淚賣賦輸殘司馬賞
卷簾看厭龍眠翠與君相遇皖江濱一種羈棲托故人
卽今移席家園近觸我經秋歸思真環滁山色知名久
何日從君乞樽酒一枝折贈最魂消不是春初大隄柳
趙公子焜自里中來攜示尊甫味辛先生辛巳歲
見寄手書云疾作不及發槭封未啓楮墨如新
泣然有作

先人罷官歸實戶步武獎風於公雖父執文譙偕雍容我
時方垂髫侍立習敬恭先人指我言屬君發其蒙語次
色慘澹隱然托孤童感公念久要厚意輸重重秘籍假

秦漢精腴兼魚熊愈我憂幽疾澆我塊磊胸旬日間良

晤折簡趨羸僮郎君辱兄事接翼聯蜚鴻嗟哉三世交

何必蘿與松

余年十四聘室楊氏殤君將爲第四女相攸太孺人以年命不合甚感其意而未果

猗歟恭毅公令德足訓代承哉君子澤昌祚此云逮十

一解聲韻十三諳體裁十五登詞壇便已主槃敦結交

多老蒼縞紵折行輩身短心益雄業進意彌退衰年抱

貞疾兢兢守三戒如水弗染塵如玉絕纖纈豈止文律

嚴塗改不厭再少年尙通脫觀法庶懲懈公言自撫謙

我聽卽良誨感舊思儀型循循發顏喟

人言我與公事事如撫鑑征衫多酒痕藥爐無斷烟晨

客遲更衣秋衾促裘縣五女字却盜一第躋登天凡茲

類公處貌似非神全貞操在廉介孤行絕攀援直無
所悔顛頓乃益堅甯非前車鑒我獨心慕焉公母望我
達書中言鄉先達欲舉繼格特科我欲偕公傳公今不可作大懼積咎
愆非徒知音逝悽然撫朱弦

張惲

阜文子居

惜早逝蒙始習銘章公見大激賞謂繼韓歐

陽二公非可幾公譽詎敢當但期遠鄙倍近附歸與方
前公棄館舍值我羈殊鄉郎君以書來墓石徵琳琅我
思報知己中宵追傍徨文成頗肖公儼然須眉蒼逮葬
不果用厥故訖未詳信知官職卑曷發泉下光我文自
有副安保傳世長元堂一以閱毀譽兩茫茫

聞方植之重赴廬州講院因寄院中生徒

人實重科目科目豈重人猗嗟方夫子身賤道自尊力行守伊緇摘藻追周秦挾此應舉察飄陸隨輕塵誠知無加損于彼如浮雲所惜求賢

朝久闕席上珍以之置史館是能讀典墳以之列臺諫是能別蕪薰譬草有屈軼在天爲慶雲蹉跎年五十忠悃不得信我別汝曹久曷驗怠與勤進詣定何似懷思難具陳幸哉得良師志氣當益振努力從修塗慰我期望殷

賦得安得廣廈千萬間

浣花溪畔屋庭草未全刪但有詩千首何來廈萬間居然開幸舍母乃幻神山墨海羣鴻起書城百雉環德星

成久聚今雨各忘還奢願他年事安居此夜慳不如營
紙閣著意護雲鬢鶯鶯鴨喧聲寂秋宵早閉關

題洞簫樓詩紀

一種傷春惜別情寒蟬那得噤無聲笑他才子誇聞道
誤把常譚乞老生

漫說微詞宋玉多經生其奈豔情何我曾上界縉刑律
綺語纔投織女梭

偶題

水天躍馬能盤硬吳苑雙蛾只餉愁忽報明駝馳騎到
戰袍一脫便梳頭

璇宮雲錦織初成勅選縫人上玉庭親聽天孫頌內式

去單留複語丁寧

盡日揮殘十樣箋儘彈清淚漬松烟詩中有畫非雲樹
幅幅眞容弟一仙

杜詩韓筆定何如各有情懷各自書待得滿堂銀燭暗
教君看取夜光珠

題張大

汝璣

春湖載酒圖

西塞山笠澤湖與君家世皆釣徒柳陰斜日快一醉況
有蘭陵之酒松江鱸無端西征事戎幕嘉峪關前夜鳴
櫓參軍老去習蠻語苦憶娥隅縱深壑攜家我亦走濡
須十載牽舟岸上居相逢共說還鄉樂寄意聊成載酒
圖大蜀蒼茫接天柱望見連蜷招隱樹四鼎神丹次弟

成建安才子尋常遇

謂吳博士鳴鏞曹博士鳴鑾

瀛洲謫吏骨仍仙

吳苑詞人筆最妍

謂劉刺史耀椿程少尹嘉樹

遲我卸帆來痛飲爲

君更賦六鼇篇

疎影

異之以陳香浦畫蕉花乞詞用白石韻

藜鈴碎玉問夜來聽雨誰伴孤宿幾日慊慊不啓聞
窗彈章儻到臣竹芳華忍俊經年慣儘曾遍花南池
北囑白陽莫染霜豪生性任伊幽獨長記初相見
處也會向夢裏折損濃綠百疊風裳自是人間無此
雙棲茅屋丁香漫訂春愁侶怕未許訴將心曲待六
花飛上寒枝看取維摩橫幅

異之病後戒茗飲用坡公蔣夔寄茶韻作詩見示

別用錢安道寄茶韻戲答

異之示我詩一篇詩思清於新焙茗方歎茶甘留舌本
却署止茶吾未省豈爲王濛水厄困胡乃劉伶婦言聽
天生嘉枿滌塵濁久與幽人淡情性先生貌古心更閒
其文韻遠格尤正金齏玉鱠勸一食俗味尙慙輸雋永
今聞戒律意轉疑何物方供咀嚼猛香橙纖指太嬌妬
紫蟹團臍亦牾獷先生體弱詎此宜反坐霜華助清冷
故交終願保歲寒諍友我猶能骨鯁爲君尺書返陽羨
計日春風吹蜀嶺調取梁溪第二泉顧笑齏司小龍餅
與君劇飲破殘夢相對雙臚光炯炯不煩遠道陟武夷
兼譏虛聲乞龍井只恐茶仙僂出山似此作合非所倖

君不見不材之木壽萬年奚取輪囷忽生瘿

醉花陰

題紡紗士女

粗服亂頭窗下坐玉腕看微情莫道不工愁長日如
年自定春閨課 荊簷竹閣低于舸歸計何時果吉
貝又重開似水簾紋底著殘絨唾

洞仙歌

附同作

聰應

香殘夢醒訝鏡奩未展軋軋機聲逐花顛一絲絲替
誰約住柔情轉忘却髣髴春風吹亂 當窗獨坐處
玉挽嬌慵知有離懷待消遣祔巧借天孫織就迴文
怎能續迴腸將斷除盼到飛鴻報平安纔信得征衣
塞垣寄遠

金縷曲

自余乞得月樵方伯所藏紡紗士女一時臨摹之本無慮數十軸輒以索題此爲楊

七伯厚作

簾外寒猶峭恁恩恩心情可是爲花迟早萬縷霜絲
千回轉耐徧雨昏風曉算只把髩雲催縞一種閒愁
渾似織便春蠶也逐寒蟬槁那更乞天孫巧浣紗
溪畔閒蘋藻儘波光照人如鏡翠睂未掃畢竟開箱
誰會著折盡纖纖長爪還待製阿侯文葆絮定奇溫
休掩泣但年年吉貝花開好儂自願閑中老

南歌子

題折梅士女

出手寒如此窺窗影未眞枝頭定是幾分春等到桃
花開放尙兼旬點額驚殘夢巡檐忍翠顰軍持欲

插又逡巡生怕宵來冰膠損幽芳

嶰筠中丞召飲八箴堂盛子履詩先成余次韻

秋光如畫擁江城舊雨頻煩岸幘迎他日便傳眞率會
隨人分受淺深觥
蘭入手歡興論種麥關心聽展聲
我傍龍山十年住朝暉莫靄最分明

寒菊曾經三徑栽琴觴前度習趨陪

肅雲汀先生

依然欵欵

平生話各有滔滔萬古來霜雪未侵憂國髭旗常詎掩
著書才樽前涼月知人意分照蘇臺又皖臺

題碧山十老圖

并序

前明天順初無錫詩人李舜明秦景暘陳天澤陸懋成
高惟清黃公福楊叔理陳行之施彥清潘繼芳結碧山

吟社於惠山之麓沈石田爲之圖十人者都七百四十
餘歲一時傳爲美譚乾隆三十五年鄒尙書一桂張文
恪泰開俱以耆年在告復邀集碧山續社於時尚書年
八十七文恪八十六登州經歷曹之揆子通南昌知縣
華西植燕鹿俱八十九諸生鄒捷敏揚八十七安化知
縣施禹言成允崇明教諭顧遷子喬俱八十中書舍人
華希閔文友七十五河間知府鄒雲城擁書七十二布
衣顧建元振川六十九較之前社享年又過之而敏揚
君以孫炳泰貴累贈光祿大夫大學士振川君以子光
旭貴贈中憲大夫兵備道積善之慶彰彰如是是足以
爲勸於鄉里矣圖藏顧氏繼輅年十七以詩質晴沙兵

備詫爲怪才受知爲最早而南昌河間兩君又與先君子同鄉舉獲觀幸甚謹成一詩書於左方

花間緩緩駐斜曛珍重詩仙此樂羣祖帳楊君先有畫
入山介子笑無文名泉不耻溫忠武誓墓甯煩王右軍
他日風流誰繼跡秋高遙望八閩雲

謂平叔
宮保

題振衣千仞岡畫障爲伯厚

置身忌太高小樓試憑眺楊生狷而狂意氣頗騰趯示
我振衣圖仿髯見清歎招手來飛仙傾耳聽眞誥素衣
本未緇特以厲貞操我無濟勝具久負山靈誚雖然出
塵境跡阻夢可到招君作臥游斗室聊寄傲無爲爭鷗
鵬罡風入寒峭

小除得伯恬宣城書知小竹卿珊溘逝哭甫定適
芙初兒子之官滇中持先集索序讀之竟日悲
不自勝率成一詩示孝佚

有客弄柔翰暫奪方銅章蕭然攜襆被就我浣花溪上
之草堂淺草丹楓十年住溪流訝我不歸去一夕鄉音
入耳來分明共喚三河渡渡口翩翩幾少年宦游輓跡
如雲烟玉樓隨風百回倒賦手於今誰最好心知彼間
多故人一片寒雲隔昏曉與君忽漫逢殊鄉君知此樂
非尋常生離何必異死別重泉絕塞俱蒼茫丁生垣前
已出嘉峪吳郎特徵昨又馳甯羌一燈話舊定何日千
杯化淚未足霑君裳江城歲暮意蕭索更展遺編懷抱

惡篇篇聲抵夜狼哀一半詩題我同作人生天壽事偶然身死尙冀詩能傳詩傳那得身親見空博千秋身後美屈指詞場數鉅公當時比我尤貧賤天公聞言顧我啼擲下三尺天街泥金烏啞啞凍不飛何論蹣跚蹙蹙凡馬蹄我得閉門卒讀劉郎詩白日剪燭今何時今年爆竹聲亦雌管生引滿慎勿辭酒醒已易新干枝

崇百藥齋三集第六

陽湖陸繼輅祁孫

玉燕集已丑

李觀察

宗傳

海上釣鼈圖

我聞一釣連六鼈蒼茫掩卷思盧敖
捐來讀畫拓眼界
虛堂滾滾驅洪濤海於天地物最鉅
先生揚帆自來去
觀察別字海帆
卽今備兵過洞庭直是先生洗研處
天風浪浪宿霧開
朱霞照耀金銀臺
魚龍百怪竊相語
錦袍仙人今又來
我家乃在具區側
五瀉一舟無十尺
賣魚一醉亦大難
垂老方知釣鉤直
忽從魚腹得素書
知有成連遠相憶
久任皖江鄉
思真江花江草鎮
愁人何時徑跨

琴高去手擷湘蘭持贈君

幽蘭

空山悄無人萬綠明朝陽誰從淺草中惜此竟體芳清
霜飄空作仙露一剪湘波見微步分明羅袂似春衫難
覓江妃入山路瑤田勑罷琅玕貢枉教王母呼龍種暮
雲三尺鮑家墳自展幽魂破殘夢歲歲尋春春已遲生
憎紅豆寄相思人閒爭擬猗蘭操彈折水絃知未知

菩薩蠻

雪夜爲友人作

朔風向晚吹逾緊推帘那見蜚鴻影小閣掩深深香
溫待展衾歸心留不住抵死衝寒去等是可憐宵
輕魂別樣消

酒波香篆都成夢。繡衾亂疊穿花鳳。窗下四絃橫。絃凍作冰。早知來又去。何苦留人住。敲斷玉釵聲。教伊特地驚。

又

雪曉爲友人作

麻姑書札凌晨遞。鸞牋尙帶香雲膩。十萬護花鈴。鶯飛處處驚。鶯飛郎不曉。但訝歸程早。雪色照窗櫺。窻明天未明。

一鸞積素門前路。今番悟徹天涯句。身重覺情輕。怨別恨成。畫堂收步障。五見櫻桃放。耐得寫閒愁。詞源接海流。

春盡日崧亭廉使示牡丹新詠病枕次韻

春色今年孰淡濃兼旬研匣尙塵封
絨衣無復香成雨

羣玉空教花想容聽到陽關歌幾疊

幕府諸君往復繼聲至七疊元韻

寄將綵筆路千重詩箋紅染燕支透也抵屏風一度逢

立夏日廉使次前韻來再答

春色何如墨瀋濃又從迎夏后絨封詩因兼賦懷人好
花亦爭爲悅已容禪榻鬢絲窻寂寂天涯芳草路重重
知公念我歡情減特許匡廬一再逢

病中聞崧亭廉使移按八閩惘然有作

轉訝今年春未闌添衣猶自怯朝寒無多知己更番別
畢竟殊鄉久住難似我飄零風外絮知人情緒月中欄
海疆先世棠陰在恨不從公一度看

賀新涼

午日節院分題得五字

試聽江城笛又無端讀騷痛飲蒲香酒瀝簾外暑風
吹已透偏爾琴聲悽惻待畫出湘流半碧照眼湖光
三萬頃怪煙波不許藏孤鷁何處泛天隨宅 穆穆
楊柳彫春色問吟鬢年年折損可還盈尺老屋三間
猶好在只是雙棲未得鎖辜負松陰寂寂六曲屏風
留一面見墻頭葉葉移歸席長命縷證良覲

又

午日節院分題得午字

花韻清如許看樽前茄牛鯨鶴天涯重五記得江鄉
當此際匝地清簫畫鼓渾不解歲時荆楚寂寂滄波
橫碧玉只漁舟隱隱炊煙舉剛稱我病情緒 數牂

正訓差能數柰年年鑄將明鏡朱顏難駐丁字重簾
間不捲坐到槐陰橫路漫驗取貓睛一縷薄是朝雲
涼是月祿陽烏幾見葵心吐那更聽竹間雨歲節記
午日午

時雨竹節中有
神水可治疾

又 芎菜生日和嶧筠中丞

老圃歡無已說朝來紅雲低擁園蔬生子正是爰辰

懲取女夬夬翻成莞爾

易芎陸夬夬虞氏訓芎爲
悅讀如莞爾而笑之莞

問

可有旂鈴偕至燕頷虎頭飛食肉笑家風未洗齏鹽

氣應得了乃翁事

從教錯寫中書字怕聽他舊來

偁願桑弧蓬矢桃未渡江梅待吉多少愆期况味祿
婚嫁鄉村容易玉樹芝蘭王謝語盼秋禾再報添丁

喜五色雀且休矣

疏影

竹醉日東嶼筠中丞和

風枝橫路問共誰痛飲沉醉如許客裏相看露重煙
濃黛痕猶自酸楚無端幾點湘妃淚又和著浪浪踈
雨翻道伊污損羅裘終古歡蹤成誤長記林間往
事籍伶正好在良會頻舉不信而今草長花飛重見
俊游前度腰肢況是年年減更禁得宿醒新暑趁石
榴半吐紅巾寫與岑華仙譜

賀新涼

大端午寓舍小飲效節院分題得十五字

節比重陽展挽流年人間惟有舞裊歌扇樓閣三層
臨水築十二珠簾齊捲休認作元宵簫管寶鏡胸前

三覆手便紅綃那見蟾光滿燈影合暮雲亂 十番
子弟風鬟顫儘厭厭消殘良夜五更不轉我別江鄉
剛十載試拉春蔥教祢也不爲玉釵魂斷曲曲屏風
都倚遍這相思路較湘流遠蒲酒瀝待誰勸

又

何梅皋大令自黔中來訪話舊有作

握手渾如夢記相逢絳帷左側娟娟雛鳳二十五年
彈指過幾度春迎秋送問須鬢何關輕重一日一回
郵遞速報頰波正解東風凍無計挽流年靛 聞君
六載歡興頌喜家聲俛喬仰梓都成梁棟只我一莊
無不治媿見年時伯仲看萬疊雲山浮動一室便成
三歲築算年來也罷西洲慟共君語有餘痛

賣花聲

友人洗馬圖

岼幘坐桐陰樹影橫
衿畫圖難寫是雄心
貌出龍媒高八尺
塞上秋深須鬢最蕭森
且任霜侵絕塵何必轡如琴
親見張翁驅塞衛
逐得仙禽

早晚

藥爐煙迤濕雲沈
草色苔痕一徑深
早晚寒溫誰定得
熟梅天氣女兒心

有贈

舊夢如雲委逝波
偶然照影感蹉跎
潯陽江上琵琶語
我是重聽淚更多

題門人趙博士

對澂

僧服小象

顧曲情懷客感多
知君著意翦情波
幾時驗取天花墜
入骨幽香奈爾何
漸空結習到文辭
老我年來證辟支
却向枯禪重話舊
擾人入定是相思

熱甚招子濤早迨

厯厯繇星帶草堂
碧天似欲迨秋光
世人正作牽情夢
誰識朝涼勝晚涼
鄉思病緒話難休
十載相於屋打頭
反覺貧家情意重
互揮紈扇換征裘

酷暑

今年酷暑異年時
臥太膏騰坐不支
賴有故人呼卽至

定菴文筆介存詩

寄中隱大令

夜夢廖生貽我藥二丸大如菰菽清如蘭廖旁兩點乃
瘳字不覺歡喜加朝飡今年病魔大作劇杜門百日尙
爾行蹢躅此中有鬼誤我不得至臺省北窓跂脚空長
歎槐陰春夢覺已久但願登山臨水容躋攀如何此樂
亦遭忌愁城堅築局重關況值炎官逞威虐鄭僑晉盾
方交歡厲齋羌無一竹一樹足清蔭并乏草色當徑落
生垣多情明月肯相照蟾蜍亦作烏輪看廳師雨師各
失職雖欲施惠嗟無權而我盡日拳曲似牛喘拘幽一
操聲煩冤聊因說夢遣長晝待君歸來和我搖柔翰

閉門

下弟人歸貌轉豐

謂異之

笑余衰鬢太蓬鬆閉門七度看

圓月者是山中是客中

扶杖

瘦影頽頽夕照斜自扶藤杖詣鄰家不知秋晚人來晚
十月初旬見菊花

題吳江族人靜涵策蹇圖

正是江村稻熟時先生策蹇欲何之回頭楓葉明鄉樹
撲面蘆花感鬢絲未必此才堪令僕從教折券費文辭
病餘我久無詩思負爾溪橋踏雪期

正月十七日小妻生子八月十四日復得一曾孫

鳳毛蠶尾他年話玉果犀錢兩度歡猶恨三聲無紡織

合從稔歲習饑寒

里中諺饑與寒小兒安

長齡幸得名卿許咳名添壽

嶢筠先生所命也

吉語聊聽術士闢

添壽以十六日夜子生望江檀秀才長城云當以十

七日推祿星盤與儀真師同而曾孫干支似陳秋舫

作父太遲曾祖早白鬚自向

鏡中看

海內朋舊喜余得子損書見賀積百許函次前韻

誌感因寄南雅宮允椒堂京尹虹舫閣部

夏晤已驚天外至

曾容同年

笑言如接座中歡此時甯免桑

弧想異日應憐葛帔寒切戒浮華名似我也知餘慶語

非譚爲公珍重畱藍本一報充閭一度看

三公望子方殷末語聊以

祝爲

荆川先生文既不自耕又不讀書屬文又不教人
讀書又以病不行慶弔家庭閒話之外更無一事
便當自稱閒道人不覺快絕云云讀之惘然率題
三絕句

文債如埽秋葉別淚疑通海潮可惜大好歲月不曾消
受分豪

天下何思何慮老僧不見不聞試問異床中士何如無
夢愚人

造物逸我以病故人不責其慵正宜爲此寂寂無煩多
遽恩恩

讀孟塗伯漑遺集

當時心許兩奇才恨未相逢把酒栖

孟塗伯漑未及定交

此日大

觀亭上望

伯漑故唐兀氏

分明同踏絳雲來

孟塗葬大龍山

禁烟時節掩雙扉又早冰絃凍玉徽今夜小庭春似海
萬花深處劔九飛

嶰筠先生舉第五子有詩索和並柬公子

爾恒爾頤

稔歲欣傳萬寶成天風吹落鳳雛聲此時全植燕山樹
他日高齊驃騎名貞又起元知未艾夜仍字叔待隨行
賓筵我亦旁生柘珍重來看田氏荆

夢過隨園見簡齋丈畫象尙懸小眠齋時得蘭村
赴三閔月矣

人傳羅什喜吞鍼我事先生未範金二十八年重入夢

辛酉八月拜公遺
象於小倉山房
霜髭風竹摠蕭森

繡葆相呼最有情
大來未改小時稱
傷心洛下分袂後
癸酉十二月與
蘭村別於洛陽
不復重聽杜宇聲

病遣

十日冰蔬凍繡腸
恰聞人餽束修羊
鄰姬十五工行炙
喚取琵琶勸一觴

萬樹梅花擁畫樓
捲簾剛借月爲鉤
連翁詩句江妃笛
吹得山雲作水流

語長心重太丁寧
佛自慈悲我倦聽
忽報九天頒秘笈
開函仍署十三經

吳質貽我月中桂

謂鄧公
子子以

服之寒谷聞春雷
明朝射獵

出城去看擊黃塵飲血來

叅同仙客曾容綠蘿裳壽我神丹治健忘挂腹撐腸五

千卷夜來一字一珠光

楊郎賦性特迂緩三月不來心念之今日相看成快絕

解裘先讀百篇詩時子壽畱滿舍山實尚未至

懸腕如風十幅成小同篆勢逼西京何當手校瑯嬛本

更爲

熙朝寫石經

珍重相逢楚雨生周郎伯恬詩筆沈郎小宛經醉來戲

續登科記催送青蓮試玉京

谷神生氣最微茫隱隱鄰家燭豆香記得兒時分一握

招呼阿買坐斜陽

衆生食住信堪憐咸籍分攜十一年昨夜分明重握手
互看鬢鬢總如前

送叔安廬州

對客初裁第一牋傳聞書記最翩翩趨庭說士猶前日
遲我辭家已十年等是負薪廉吏子依然飛雪送人天

已卯送尊君解廬州郡哭未
送賢兄之宣州俱值風雪

郎君縞素添蕉萃知有遺

民泣道邊

寄兌貞

前年送汝歸行行別淚貫今年送汝歸寸寸別腸斷雙
丸故依然光景暗中換流年過五十疾去若奔竄卽事

多所歡已減一日算矧值舊疴發禁此百憂亂粧閣忽
晝扁獨行自開看重疊排几榻狼籍棄豪翰色色推心
肝茫茫失昏旦浮生本煙雲誰迫置水炭厥誤有兩端
曰惟婚與宦

食時風力勁汝行已百里未別欲行遲既別欲行駛婦
人內夫家畱汝諒非禮汝來舅姑戚汝去舅姑喜舅姑
亦有女家貧復多子不得常歸甯望衡亦徒爾嗟哉女
子身歡笑日有幾

空庭獨徘徊新月又窺樹約略計前途知汝泊舟處母
裏日以遠父疾復未愈寒鴉各歸巢落葉正橫路汝性
不飲酒何用遣愁緒忍心耐初程承顏憶前度訴月月

不聞悽然掩雙戶

非汝舍我去我行自淹留士衡三閭屋欲贖豈易謀嗟
哉銜蘆鳥負此下水舟累汝勤省侍不敢憚阻修東歸
西又怨南歌北其憂動足輒千里弱女乃壯游吾衰何
足道恐汝鬢影秋

送汝不能違我病久杜門汝行還入閨汝母拭淚痕竈
妾及乳媪相顧皆聲吞有婢年最小禱天噴有云願阻
十日風雨雪復浹旬仍同共歲暮歸期待來春我聞爲
破涕驗汝慈惠真因揣汝來時汝家亦紛紜汝亦不忍
別反顧何頻頻何以勸壻學何以答姑恩明年迎汝至
一一爲我陳

朝餐爲汝加夕飲爲汝醉自然消憂愁何止工應對汝
今不侍側歸也欲誰懟絡秀剪長檠循例一尊待抱兒
教呼爺意可女兒代詎彼亦傷離顧盼姊安在推案不
復飲遶屋但頻慨醒眼聽嚴更無因得成寐

唐小迦示印子金拓本

文曰劉主相傳爲淮南王安燒丹所遺今淮水中往

往有之

道書我嬾披鴻烈國姓差堪補說文先是鐵錐誠快絕
豈知復有辟陽孫

富貴神仙盡劫灰恩恩兵解亦堪哀遺金若遇劉文叔
早爲東京作識來

今聽雨齋雨坐時兌貞解纜五日矣

經秋枉署小齋名五月何曾聽雨聲今夜雨偏聽不得
有人江畔一舟橫

黯黯寒燈獨飲餘瀟瀟暮雨泊船初可憐一種離人淚
汝爲思親我不如

寒甚懷兌貞

十一月十五日

寒意誰先覺先應到客舟陰連前夜雨散憶十年裘荒
驛柝聲斷沿江漁火收長娥知別苦瞞過月當頭

卽事示聰應

典裘買米尋常事且辦朝餐耐乍寒我自病餘還恃粥

時苦肝木乘脾

暇粥五十日矣

姑聞婦至已加餐

是日得懷妃書云室

人知君子且至宿病

愈故鄉望雨知何似廉吏分金亦大難

方曉州尚未得

報
記得一囊歸思急江天風雪正漫漫

紀事爲管含山

繩焚

狼嚙小兒體已殘小兒爺孃啼向官官下肩輿撫兒泣
爲兒復讐索狼急狼穴安在役不知狼不就擒官則思
抽毫展牘書有詞呼吏焚致城隍祠祠神稱職殊可喜
翼日喧傳獲狼矣神人響應捷若斯官若貪暴神知之
君不見一狼衣冠堂上坐堂下羣狼搖尾過

悼蔣沛畜戶部

前年至京師君先枉車騎翩翩宰相子謙抑斂英氣云
自弱冠來已積十年思甫從博陵厨君爲吳巢松侍講女壻得見
士衡製我雖慙虛聲竊已感古誼因之不自外邸第時

一詣玉樹非一株同心挈予季

濂生員外

丁卯本舊交眉山

亦新契

時許王年大令蘇賓嶠庶常並客邸第

譚深訝日短寒月破晚霽

疾驅宣武門劣及一扇閉初但驚君才久乃見君志窺君一往情求友特其次使相初還

朝勛德冠一世休休若已有汲汲以人事朝聞一士賢

算輒夾袋記凡公所祓濯大半公輔器或外膺封圻或

內陟卿貳吾鄉李鳳臺

兆洛

林壑早頽廢公頻顧我歎

能勸出山未區區下邑宰惓惓不輕置方知一个臣爲

國抱深計平津安足言平原亦非例猗哉賢公子能體

相公意似我樗櫟材亦恐失交臂春風吹歸輪瓊樓望

天際重把北海樽幾陸岐路涕雖然一二年繼見亦尙

易何圖成永訣倏共白雲逝豈真玉樓成賦手選瓊麗
不然王子喬薦作香案吏君方任家督亦旣與

廷議未聞捐

君親神仙逐遊戲爲善無長年懲勸毋廼替惘惘誠私
情侃侃實公義天高不可問此惑抱非細因風寄一篇
開緘泣難弟

憶兌貞

小閣文窓日日扃裁箋放筆總無聲宵來看月窓前過
錯喚雛鬟送短檠

索啟閒門拂鏡臺休教綈閣著纖埃疎簾響竹都如舊
待爾明年消夏來

病齒今年劇往年朝妨餽粥夜妨眠轉疑天與閒消遣
無病心情更可憐

古渡雲灣隄暮雅計程今日可還家不應更灑思親淚
耐取迎門笑語譁

承歡亦許規親過勸學何妨聽婦言惆悵兒曹都習惰
無心仍設祭詩筵

今年子壽聰應詩文俱甚少

幅幅鄉思畫筆工雲溪烟景最冥濛而今嬌女溪頭住
更展橫圖著小篷

香山婢子解懷人昔昔鐙前拭淚頻一角闌干寒月色
隔江離緒照來真

乍看飛雪點疎林可惜階前積不深玉戲未成人倦臥

撒鹽亦已罷聯吟

孔浮洪賦總喧囂蔣詡填詞冠

本朝記得夜吟清絕處花香露氣一時飄

病裏頤仍研北支別來日日有新詩幽思苦緒無人會
自抱狸奴說與知

徐博士芬輓辭六十韻

我年十五初識君面若傅粉殊塗屑方結吟社雲溪濱

錢司訓別駕呂照若郡守俱嶙峋差肩近接洪黃

孫謂雅存仲則我懷欲吐行逡巡孤露獨學未有聞或

如威鳳如祥鷹公等高視甯與羣君從元亭先師隨安先生見

我文詫我才筆排天根驚采絕豔含悽君不知何人彼

前身庶章雲李王伊人

當時君語先師如此

凌晨徒步來破門折

簡出衷錦字勺上書曾祖父母昆科第仕宦并歿存下

書名字妻子均再拜肅立口有云願師僑札懲張陳我

慙爲兄君勿瞋乘車戴笠詞諄諄我時感君氣誼真白

母畱客村醪醇母出屏後聽講論此客近迂非惡賓翼

日命我答拜勤從茲交道通燕秦優龍劣虎爭玢璘我

重隗始意轉親中復同客明湖潯狂哥痛飲連冬春孤

山喚起梅花魂芳草醉藉眞孃墳一篇哀誅感鬼神

畢宮保文光爲一時傳誦

君時才名亦益振義娥日夕駕兩輪四十

年事如飛塵綠鬢訝此霜華新一官待次猶遄迫窮老

客寄皖江雲傭書束縛桂作薪右臂斷折雙瞳昏終日

伏案眉不伸疽發於背方吟呻勸歸剛及撤瑟辰差勝

旅殯彭城闔遺詩卷帙半未分君有快壻亞右軍

楊七大壻

當能決澤玉與珉光氣不至長壘堙君隨爾兄

郡守大格州牧

書朝玉宸校勘仙籍需才殷似君詳春真其倫填胸塊

磊銷輪困人間擾擾多苦辛切勿再渡銀河津我詩不

藉卅六鱗因風飄然達九閭

家鐵山翁懷橘思諉畫軸翁孫靜涵索題

吾家公紀荀虞儔惜哉遺書不可求百五十事姚氏本
片羽未足窺全裘世儒墨守朱本義日月甯知有變例
名氏翻教婦孺傳豔說童年懷橘事鐵山翁公末孫至
性不媿偏將軍寫生傳色亦絕倫家貧豈得儕千戶負

米年年客江浦員果曾枝一斷腸思親心比湘纍苦移
傍金蕙繪作圖生綃猶見淚痕無小同但覺楹經好那
識龍陽有木奴我別鄉關逾十載朱顏暗逐霜橙改楚
頌名亭願尙虛忘憂樹背今安在風雪江城起暮寒黃
柑丹橘正堆盤攜將廉守歸舟石便作殘年畫象看

雨夜

辛苦園蔬抱甕澆經旬重見雨珠跳沈沈虛室疑臨水
隱隱空江已長潮銀雁膏殘畱小炷金猊香潤耐深宵
清娛也喜禁寒坐待到閒庭絮影飄

夢滿舲枕上口占

新銜猶未換條冰

君以史館提調
記名知府三年矣

握手翻教別恨增

日下漸稀同志友

時沛畚申受濫逝梅梁樹
珊蘭雪諸子先後改外

人間真有

在家僧

君官翰林十年不攜眷屬
同人過訪皆直入臥內

十年過夏風前淚一

粟聽秋枕畔燈往事依稀都似夢不須苦惜夢無憑

柳州十八字石刻拓本伯厚索題

循吏廟食禮所宜羅池片石吾無譏此刻草書十八字
特爲蠻鄉逐疵癘柔毫三寸挾風霜足配韓文鱷魚避
楊生重是唐人書珍賞不減歐褚虞暇時示我索題句
因感往事相嗟吁順宗病瘖不聽政王叔文伍竊國柄
陽山之貶正此時乃於劉柳信不疑居今論古易爲斷
豈有身受無聞知投荒尙請柳易播甯肯附和爲姦欺
從來宵小畏清議例引名士張藩籬餘財曾未污文若

九錫安能強穆之書生懷才急自見究異好爵堪羈縻
逐臣萬里懷天闕瘴雲匝地埋冤魄曲宥猶能活蝮蛇
去思無怪爭蠻貊先人當日守遐陬珍重歸喪一紙收
卽今碑已殘三字龍城柳龍字神所守所字制九醜九字俱已闕金石依然不
久畱迂生軒輊爭韓柳誰識瑰辭如一手若以離騷繼
國風河東似出昌黎右底無年命比元劉鑄鼎燃犀百
怪讐亦有賜環身未及爲君掩卷泣忠州

題伯厚前配史夫人倚竹圖并示公子頴孫

却扇詞成字字新當時喜爾配詩人青廬只我披帷坐
元是崔盧中表親

頻年游客意辛酸作婦貧家事事難今日豐容遺挂在

幾曾衷薄怨天寒

賣珠亦是豪門事
廉吏家風珠也無
說與他年寇萊國
休教蠟淚滿瓊瑜

倦游篇爲李三

復來

題畫

心骸示我倦游圖
囑我試作倦游詩
倦游意緒我最知
景色棖觸難爲辭
孤寒分作依人鳥
若論辭家比君早
江流百折磴千盤
催客登程怨春草
劍閣連雲鄉夢斷
若較游蹤君更遠
玉壘纔看幾疊青
征衣已自三番浣
下第情懷乞米箋
長安小住又經年
天橋濁酒邀同醉
雨館孤檠憶對眠
床頭金盡愁無奈
此時家在青天外
取道商量水陸難
從行辛苦僮奴懟
榻上青氍坐欲溫

江干片席仍相待何止津梁古佛疲難禁岐路仙真淚
銜蘆元是戀巢禽一寸沈吟去住心風雪歸淙濱歲暮
關山離恨逐年深竭來久客皖江潯攜家差勝孤征苦
漫說揚州月二分知君未是樊川杜周郎濟畫筆軼三
王爲寫生綃託興長飄蕭鬢鬢中年後淩亂琴書大道
旁畫餅聲名徒嚇鼠駢枝官職罷分羊與君各有蓬蒿
宅陳渡橋南豐樂坊

附同作

李兆洛

天涯渺難卽吾意其蹉跎江上無芙蓉褰裳意云何
吾子好筋骨廿載歷坎坷陸豈無虎狼水豈無蛟鼉
行行爲誰驅萬里俯仰過詎云恃忠信遂可輕風波

倚杖得小休陶然契天和託宿在何許前途尙坡陀
造物勞以生未死敢有他息陰諒非遁逝者亦已多
仰視滄浪天效彼勞者歌努力爲我起斯路幸不訛
甘受田父笑毋爲僕夫呵請借雙行滕以爲安樂窩
病餞

敬陳酒脯禱臺貽藥裹醫方拉雜摧文可送窮元有例
鬼猶求食豈無魑畱髡已作經年聚訪戴毋煩異日來
朝服阼階吾敢慢禮成喜見凍雲開

右送神

幾回剪韭負春盤迨剪冰蔬尙減餐我肯妄稱前太歲
君原自有大還丹從今胥脚游山健正好須睂點雪看

驗取詞源饒萬斛試邀吟客一登壇

右神答

寒夜示濯姬

風已排窓雪未成峭寒猶與坐巖更遙憐道韞思家苦
喜聽冬郎學語清熾炭自溫行藥酒縫裳低趁讀書聲
吾家慈訓傳天下何以他年繼令名

輯春芹錄成懷舊感知呵凍有作

并序

文王嗜菖蒲蒹孔子縮頰而食之性有所癖不能喻之
他人也余好食春芹以爲味在早韭晚菘之上豈定論
哉選六家詩成聰應請書名會方食芹名之曰春芹錄
何者詩不盡六家六家詩不盡此數首然而荔枝江瑤

柱遠莫能致春芹則既習而嗜之矣後有覽者幸毋以膾炙繩之

萬里游輓萬卷書不師鮑謝况韓蘇兵閒索句秋聞角

林下衡文夜有珠公嘗甲乙同時少年之作定繼輅弟一大興舒位弟二經學爲

公刪劄記霸才隨地闢名區顧塘自昔詩人住蘇里第鄰文忠

公故宅想見吟魂曉夕俱斷北集

竹垞樊榭豈同論杜老千秋此替人名士猖狂潛破膽

相公蘊藉待傳神茂宏誰付曾揮塵汲黯能忘後積薪

賤子最深逾分感先母七十壽言李味莊陳桂堂諸公皆稱侍生先生獨稱姪楹牋

懸處一沾巾有正味齋

美人香草太差池六義先亡比興詩賈傳還朝仍待次

桓寬著論豈傳疑杜門頗厭高軒過並世應無夾袋遺
最是夜寒禁獨坐

公平生早退無一
日不讀書待旦

曉雅啼後動鄉思

賞雨
茅屋

翩翩玉佩雜瓊琚佚事流傳半子虛牘尾批還王大令
琴心豔絕馬相如我來賭酒豪情在人到研經結習除
卷卷丹黃皆手澤一編休便借藏書

芳茂山房

爲數平生事事奇到頭成就一家詩游爭山賊崎嶇徑

死值湘妃涕泣時

君以竹
醉日卒

黃祖敢加名士及烏孫競獻

謫仙卮孤兒文譽因誰記五日樽前有所思

更生齋

曉聞畫角夜聞砧片語能傷萬古心華嶽游來詩境盡
信陵葬後酒柸深白楊自種秋庭樹元石虛生墓道金

幸我未經交叔度上邪一曲爲沈吟

悔存齋

見說

見說軺車已渡河東朝廷辯事如何同升公叔需才急
新出與駢得謗多方笑上卿徒嗜芟况聞故宅尙牽蘿
巖疆十載資威望肯爲流言譴伏波

當日聽雞兩少年絕塵快著祖生鞭還朝敢載南宮寶
謫宦求輸西邸錢慧鳥本來能學語新蛾豈便爲爭憐
武威書記非吾願一笑曾歌愷悌篇

中隱勸以九香蟲入藥服之有效走筆報慰

漫許狂吟氣尙豪雕蟲刳盡解牛刀詩人服散名尤豔
廉吏傳方價不高爲爾徑思增尔雅養生且欲反離騷

雉膏羊炙銷寒具早晚從公醉濁醪

次韻答伯厚

索得鄰翁一把茅羈棲似此定堪嘲雙飛便作將雛燕

君新娶夫人山妻中表返哺重營避歲巢太夫人省仲

女弟聞撫前子甚有恩日短難償毛穎債天寒翻絕翹生交閒閒十畝

同安慶度歲他年事莫漫更端賦樂郊

服九香蟲散脾泄得差稍稍思食中隱有詩誌喜

復此報謝

比屋聞高咏裁箋慰病夫感恩惟藥石銘德在槃盂笑
免季倫婢歡生穎士奴家風思萬石賦手愧三都范叔
今無恙廉頗豈受誣佛頭差未著鬼面不須塗憶昨更

衣數頻煩捧腹趨疾非因入井寒反罷提壺羣效溪邊
澣危同灞上逋高冠空岌岌得貨亦區區投溷驚齊虜
嘗新謝晉巫莫嗤聞道晚五畝盡歸乎

謝嶰筠中丞餉瓢兒菜

挂席鄉園近烹蔬幸舍同水從顏巷汲非代庖充藉
慰枌榆思仍饒杖杜風民皆無此色我正負年豐冬來病
膳妨食垂五十日頃始小差拙婦隨朝爨驕兒罷夜舂撒棄違聖訓

煨芋謝禪宗笋盡千霄竹葵餘向日叢多公念衰病何
止恕踈慵函問材官憊親裁尺素工紫墨看擺極丹桂
折象耳漸欲成樗散甯堪備藥籠挑春先閉戶二三月間即以
肝疾醺臘尙扶筇樾陰深深庇蘭言欵欵通偶然叅玉

版復此損詩篇名已儕諸葛儀因想謝公加餐行努力
聊自托秋容

附中丞來詩

石城艇子沂江來鄉味剛宜雪後佳春遠如梅堪寄

隴品高似橘不踰淮

此菜惟吾鄉有之移種他處卽變作尋常白菜矣

黃金

細碎心攢纈碧玉惺忪股折釵筐篚分貽非饋歲知
君食菜正清齋

喜雪有作

一秋望雨不得雨入冬晴乾復如許凌晨喜見雪滿天
勢壓蝗蝻不出土病夫畏風若鋒鏑此日閒窗手親拓
特恐階前積不深使我清興忽蕭索官滿客寄今四年

得歸亦乏躬耕田年豐米賤旅食易此豈有意哀顛連
晡時雪止風轉銳一巷喧聞屐聲碎嘉祥召怨詎所卹
戰慄衝泥亦難耐恰有杖頭三百錢呼取鄰翁四五輩
烹蔬煮酒聊禦寒不覺頽然我先醉

題蘇文忠畫壽星像石刻

蒼龍疑疑角亢間雅訓實冠星名篇何年造作此幻柏
頭長身短衣褊褊因字象形魁宿現牽牛織女秋相見
一時戲謔竟流傳摠爲人心怨孤賤坡公作此圖當在
黃州時元豐年月推可知孤行雖已得鐵杖吉夢那便
食瓊芝蠻鄉瘴癘侵衰病湯火餘魂驚未定除是天星
默護持特爲逐臣延壽命觀醮如聞玉佩聲降神亦受

仙書贈偶托丹青意轉傷何妨碧落呼能應中元月色

最荒涼

公以七月十五日終於吾郡

照見騎箕到帝旁天自酬公千

古壽不須封爵比文昌

公死作奎宿亦道家附會語

謝徐公子

乃溥

寄新會香橙

往者楊司業

畢園觀察

爲言新會橙十年游客興千里故人

情啟篋香猶烈凝脂味轉清膏先防四溢破或待三更

那更求蒸栗惟應矢報瓊黃柑今減價

皖柑亦稱佳品

丹荔許

爭名漬訝吳鹽誤涼消越酒醒吹蘭知換息嚼玉不聞

聲羅屐層層裹春葱旋旋擎崔徽如可喚

君前有倚桐士女之贈

皓齒定教呈

侯青甫博士

雲松

遠寄秋日九詠值病餘歲晚不

及徧和率效二首並呈嶰筠先生

荷花梅雨任飛揚，偏是言旋意轉傷。
縱去豈如鴻踏雪，再來難定玳爲梁。
銜泥差免水弦污，此地曾經雞羽將。
記得晚歸簾未放，有人倚檻竚斜陽。

燕

嘹唳征鴻見一繩，雙雙誰是去年曾。
由來得食能教住，一樣禁寒就所勝。
爲汝歲華驚晚晚，豈無鄉思又因仍。
相逢多少孤飛鵲，壓背嚴霜半作冰。

鴈

書華南大令詩後次自題韻

客居同冷巷，曉夕得經過。
客有少陵癖，能生叔度波。
莫驚來日少，且喜積詩多。
稍覺聲悲壯，銅絃和未和。
嶰筠中丞大計羣吏署小宛上，
考喜而有作。

生就寒花不見春
衡寒剛選賞花辰
世皆欲殺言詞戇
我亦心疑骨相屯
且試一揮知已淚
何妨竟現宰官身
衡才沈宋天然好

于庭先以俸滿論薦

看取他年附傳人

餞歲行和嶰筠先生

季夏之初病掩關
雪霽忽見龍眠山
山容慘澹減膏澤
客鬢對此驚彫殘
江城爆竹喧如雨
鬱壘神荼相向譟
暮雲還山水歸壑
獨有華年積何許
辛壬癸申強命名
孰爲收藏孰長羸
孰驗晦朔堯階賞
昏旦晝晡雞初鳴
苦爲虛空著痕迹
冠昏服政垂作經
櫛沐食飲俱有程
各各俛首從使令
時移事往心忤忤
若有人兮御風行
似影非影聲非聲
但一屈指瞿然驚
甯知大椿八千歲

從無落葉無抽萌土膏時寒復時暖時晴時雨時晦冥
時沃甘露飛雷霆彼豈有意矜修齡無心貞運此可觀
安用後會期丁甯先生憫念諸有情滅度一切超三乘
歡喜讚歎得未曾我悟妙諦益證明文亦不效韓吏部
賦亦不學江醴陵金輪西馳銀燭代滿引離觴收別淚
我倦欲眠君勿待又有陽鳥喚殘醉